

A: MACHNAMH

Beidh tú ag féachaint ar ball ar mhír faoi theaghlaigh a bhfuil a bpáistí á dtógáil acu trí mheán na Gaeilge. Pléigh na ceistanna thíos leis an duine in aice leat:

1. Cén mháthairtheanga atá agat?
2. An labhraíonn tú Gaeilge le mórán daoine? Cé hiad?
3. Cad iad na teangacha atá agat?
4. Féach ar an bhfíseán [seo](#). Cad iad na pointí is tábhachtaí a dhéanann na teaghlaigh san fhíseán?

Is féidir an físeán a scanadh anseo.



B: FOCLÓIR

1. Beidh na focail thíos le cloisteáil sa mhír ar ball. An féidir leat na leaganacha Gaeilge a aimsiú anois sula bhféachfaidh tú ar an mír? Bain úsáid as www.focloir.ie chun cuidiú leat, más gá.

a) <i>organisation</i>	
b) <i>aim, objective</i>	
c) <i>reflection</i>	
d) <i>campaign</i>	
e) <i>video series</i>	
f) <i>generation</i>	
g) <i>lively</i>	
h) <i>thinking about</i>	
i) <i>source of inspiration</i>	
j) <i>native speakers</i>	

2. Féach ar an mír den chéad uair. An raibh na focail chéanna agat féin?
3. Cén Ghaeilge atá ar *motivate/encourage* agus *broadcast*?
4. Tá cúpla brí ag an bhfocal 'glúin'. Cad iad? Téigh go dtí www.teanglann.ie mura bhfuil tú cinnte.
5. Cén difríocht atá idir 'clann' agus 'teaghlach'?



C: TUISCINT

Bí ag obair leis an duine in aice leat. Féachaigí ar an mír arís agus freagraí na ceistanna thíos le chéile:

1. Cad a dhéanann an eagraíocht <i>Tuismitheoirí na Gaeltachta</i> , dar leat?
2. Cad atá i gceist leis an bhfeachtas a sheol an eagraíocht sin?
3. Conas a dhéanfa cur síos ar na físeáin sa tsraith?
4. Cén sprioc atá ag an bhfeachtas seo?
5. Cad a deir Sorcha Ní Chéilleachair faoi na daoine a ghlac páirt sna físeáin?
6. Cad a bhí le rá ag Lucia Atencia? (An mháthair a fheicimid amuigh ag siúl lena hiníonacha)
7. Conas a dhéanfaidh <i>Tuismitheoirí na Gaeltachta</i> poiblíocht ar an bhfeachtas?

Cuir do chuid freagraí i gcomparáid le freagraí an duine in aice leat.

D: FEASACHT TEANGA

1: Cruinneas gramadaí (iolra + séimhiú ar an aidiacht)

a) Cén fáth a bhfuil séimhiú ar an bhfocal ‘sóisialta’ sa sampla seo ón mír?

na meáin shóisialta

b) Cuir an fhoirm cheart de an haidiachtaí sa cholún ar dheis:

gluaisteáin (mór)	
báid (deas)	
fir (gnóthach)	
físeáin (suimiúil)	
leabhair (deacair)	
anlainn (blasta)	

*Tá tuilleadh eolais le fáil ar ainmfhocail a chríochnaíonn ar chonsan caol sa mhioncheacht!

2: Na canúintí (Canúint na Mumhan)

Tá canúint na Mumhan ag na cainteoirí ar fad sa mhír. Éist leis an mír uair amháin eile agus breac síos na pointí teanga a bhaineann leis an gcanúint sin.


1.	
2.	
3.	
4.	
5.	
6.	
7.	
8.	
9.	

E: CUMARSÁID

1: Caint

Bíonn páistí a thógtar le Gaeilge in Éirinn dátheangach, de ghnáth, toisc an Béarla a bheith chomh láidir sin sa tír. Is iomaí buntáiste a bhaineann leis an dátheangachas (*bilingualism*) agus leis an ilteangachas (*multilingualism*). Bí ag obair leis na daoine eile sa ghrúpa agus pléigí na ceisteanna thíos.

- Cad iad na buntáistí a bhaineann leis an dátheangachas/ilteangachas, dar libh? Scríobhaigí amach liosta le chéile.
- An mbaineann aon mhíbhuntáiste leis an dátheangachas/ilteangachas, dar libh?
- Cad iad na dúshlán a bhaineann le páistí a thógáil le Gaeilge, dar libh?



2: Scríobh

Samhlaigh go bhfuil tú ag obair don eagraíocht *Tuismitheoirí na Gaeltachta*. Iarradh ort píosa a scríobh don suíomh idirlín a spreagfadh daoine chun a gcuid páistí a thógáil le Gaeilge. Scríobh idir deich agus cúig líne dhéag anois ar na buntáistí a bhaineann le clann a thógáil trí mheán na Gaeilge.

<i>Tá go leor buntáistí ag baint le clann a thógáil le Gaeilge ...</i>

AN SCRIPT

Siún Nic Gearailt

Deir an eagraíocht *Tuismitheoirí na Gaeltachta* i gConamara go bhfuil sé mar sprioc acu tuismitheoirí go bhfuil leanaí óga acu a chur i mbun machnaimh maidir lena gclann a thógaint¹ trí mheán na Gaolainne². Sheol *Tuismitheoirí na Gaeltachta* feachtas nua inniu, sraith físeán ar ghlac teaghlaigh ó cheantair Ghaeltachta na tíre páirt ann.

Donncha Ó Murchú

Tá glúin óg na Gaeltachta á ngríosú chun cainte ag an eagraíocht, *Tuismitheoirí na Gaeltachta*, a chuir tús spleodrach le feachtas nua inniu, dírithe ar theaghlaigh a bhfuil a gcuid páistí á dtógaint trí mheán na Gaeilge acu. Aon teaghlach déag ó cheantair Ghaeltachta na tíre a ghlac páirt san fheachtas agus a bheidh le feiscint³ sa tsraith físeán úrnu a seoladh inniu.

Sorcha Ní Chéilleachair, Ceannasaí Thuismitheoirí na Gaeltachta

Is é an sprioc atá againn, is dócha, leis an bhfeachtas seo ná daoine – tá sé ana-shimplí⁴ – daoine a chur i mbun machnaimh. Agus, b'fhéidir, daoine nach bhfuil aon pháistí fós acu, daoine óga agus daoine, b'fhéidir, a bheadh ag cuimhneamh ar chlann a bheith acu chomh maith. Agus go gcífidís⁵ é seo agus b'fhéidir go rachaidís i mbun machnaimh.

Donncha Ó Murchú

Tá *Tuismitheoirí na Gaeltachta* ag súil go mbeidh an togra seo ina fhoinsé inspioráide ag teaghlaigh eile ar fud na tíre atá ag cuimhneamh ar a gclann a thógaint trí mheán na Gaeilge.

Sorcha Ní Chéilleachair, Ceannasaí Thuismitheoirí na Gaeltachta

Dheineamar⁶ iarracht daoine le cúlraí teanga éagsúla a bheith againn sna físeáin seo agus tá an dá thaobh againn. Is dócha, tá gach aon rud ó an bheirt tuismitheoirí ina gcainteoirí dúchais go dtí beirt nach ón dtír⁷ seo in aon chor iad agus nach í an Ghaolainn ná an Béarla fiú amháin a dteangacha dúchais. Agus gach aon rud idir eatarthu – daoine a d'fhoghlaim, máithreacha a d'fhoghlaim an teanga, aithreacha a d'fhoghlaim an teanga, daoine atá ag foghlaim fós...

Lucia Atencia

'An rud is deise, i mo thuairim, faoi leanaí a thógaint anseo sa Ghaeltacht ná go bhfuil na leanaí tógtha ag an bpobal.'

Donncha Ó Murchú

As seo amach beidh fógraí teilifíse agus raidió á gcraoladh mar chuid den bhfeachtas ag *Tuismitheoirí na Gaeltachta* agus beidh teacht ar an tsraith físeán, leis na teaghlaigh éagsúla, ar na meáin shóisialta.

Donncha Ó Murchú, Nuacht TG4.

¹ tógaint = leagan canúnach de 'tógáil'

² Gaolainn = leagan canúnach de 'Gaeilge'

³ feiscint = leagan canúnach de 'feiceáil'

⁴ an-simplí a scríobhtar sa Chaighdeán Oifigiúil

⁵ go gcífidís = leagan canúnach de 'go bhfeicfidís'

⁶ dheineamar = leagan canúnach de 'rinneamar'

⁷ Canúint na Mumhan atá ag na cainteoirí ar fad sa mhír; mar sin, cloítear le nósanna na canúna sin maidir le réamhfhocail agus an t-alt, mar shampla, urú seachas séimhiú i ndiaidh 'den' agus 'don', agus urú ar ainmfhocail dar tús 'd' agus 't'.

NÓTAÍ & FREAGRAÍ

A: MACHNAMH

Réamhchleachtadh 1:

Cleachtadh gearr cainte é seo chun tús a chur le rang bríomhar ina mbeidh na foghlaimeoirí ag féachaint ar mhír nuachta, ag déanamh cleachtaí cluastuisceana agus ag comhrá faoi thopaic a bhaineann leis an mír ansin. Tabhair deis do na foghlaimeoirí na ceisteanna a phlé le chéile. Pléigh na ceisteanna leis an rang iomlán ansin.

Tabhair deis do na foghlaimeoirí na ceisteanna a phlé le chéile. Pléigh na ceisteanna leis an rang iomlán ansin.

B: FOCLÓIR

1. An stór focal:

<i>organisation</i>	eagraíocht
<i>aim, objective</i>	sprioc
<i>reflection</i>	machnamh
<i>campaign</i>	feachtas
<i>video series</i>	sraith físeán
<i>generation</i>	glúin
<i>lively</i>	spleodrach
<i>thinking about</i>	ag cuimhneamh ar
<i>source of inspiration</i>	foinse inspioráide
<i>native speakers</i>	cainteoirí dúchais

- Déan plé ar na focail a bhí acu féin. B'fhéidir go raibh leagan eile acu de na focail.
- Gríosaiḡ – *motivate, encourage*; craol – *broadcast*.
- Is iad na cinn is coitianta ná *knee* agus *generation*.
- Ciallaíonn 'clann' páistí agus tá ciall níos leithne ag 'teaghlach' – deirfiúiracha, deartháireacha srl.

C: TUISCINT

Féach ar an script.

D: FEASACHT TEANGA

1: Cruinneas gramadaí (iolra + séimhiú ar an aidiacht)

- Is gnách séimhiú a chur ar aidiacht a leanann ainmfhocal a chríochnaíonn ar chonsan caol san iolra: na meáin shóisialta.
- Cuir an fhoirm cheart de an haidiachtaí sna bearnaí thíos:

gluaisteáin (mór)	mhóra
báid (deas)	dheasa
fir (gnóthach)	ghnóthacha
físeáin (suimiúil)	shuimiúla
leabhair (deacair)	dheacra
anlainn (blasta)	bhlasta

2: Na canúintí (Canúint na Mumhan)

Féach:

1.	'go bhfuil': Úsáidtear 'go' in áit 'a' nuair a bhíonn an clásal coibhneasta indíreach i gceist.
2.	'tógaint': Leagan canúnach de 'tógáil'.
3.	'Gaolainn': Leagan canúnach de 'Gaeilge'.
4.	'feiscint': Leagan canúnach de 'feiceáil'.
5.	'ana-shimplí': Leagan canúnach de 'an-simplí'.
6.	'go gcífidís': Leagan canúnach de 'go bhfeicfidís'.
7.	'dheineamar: Leagan canúnach de 'rinneamar'.
8.	'ón dtír': Cuirtear urú ar ainmfhocail dar tús 'd' agus 't' sa tuiseal tabharthach.
9.	'den bhfeachtas': Cuirtear urú seachas séimhiú tar éis 'den' agus 'don'.

E. Cumarsáid

1: Caint

Tuairimíocht atá i gceist leis an gcaint seo den chuid is mó. Seo thíos cuid de na tréithe a bhaineann le leanaí dátheangacha/ilteangacha:

- ✓ Bíonn siad an-mhaith ag díriú ar rudaí, go háirithe má bhíonn an timpeallacht an-challánach/an-ghlórach.
- ✓ Is minic scileanna maithe matamaitice acu agus bíonn siad go maith ag réiteach fadhbanna.
- ✓ Bíonn siad an-chruthaitheach (*creative*) go minic.
- ✓ Is minic a bhíonn siad go maith ag léamh agus ag scríobh agus iad an-óg.
- ✓ Nuair a bhíonn cur amach ag leanaí ar níos mó ná teanga amháin bíonn scileanna cumarsáide maithe acu.
- ✓ Cuidíonn an dátheangachas/ilteangachas le cuimhne mhaith a bheith ag duine.
- ✓ Bíonn níos mó deiseanna sa saol ag daoine a bhfuil níos mó ná teanga amháin acu.
- ✓ Léiríonn an staidéar atá déanta go mbíonn siad níos leathanaigeanta (*more open-minded*), níos fulangaí (*more tolerant*) agus níos báúla (*more empathetic*).

2: Scríobh

Abair leo píosa a scríobh a spreagfadh tuismitheoirí chun Gaeilge a labhairt lena bpáistí.

Curtha ar fáil ag



Ollscoil Mhá Nuad
Ollscoil na hÉireann
Má Nuad

Lárionad na Gaeilge
Taighde, Teagasc
& Tástáil

le tacaíocht ó

An Chomhairle um Oideachas
Gaeilge & Gaelscolalochta



An Roinn Turasóireachta, Cultúir,
Ealaíon, Gaeilge, Spóirt agus Meán
Department of Tourism, Culture,
Arts, Gaelic, Sport and Media

